

摘藻堂四庫全書薈要

集部

欽定四庫全書薈要卷一萬八千九百十一

集部

御定佩文齋詠物詩選卷二百八十九

楊柳類

五言古

折楊柳

梁簡文帝

楊柳亂成絲攀折上春時
葉密鳥飛礙風輕花落遲
城高短簫發林空畫角悲
曲中無別意併是為相思

詠陽雲樓簷柳

梁元帝

楊柳非花樹依樓自覺春枝邊通粉色葉裏映紅巾帶
日交簾影因吹掃席塵拂簷應有意偏宜桃李人

賦得垂柳映斜谿

陳張正見

千仞清谿險三陽弱柳垂葉細臨湍合根空帶石危風
翻夾浦絮雨濯倚流枝不分梅花落還同橫笛吹

西澗種柳

唐韋應物

宰邑乖所願黽勉愧昔人聊將休暇日種柳西澗濱置
鍤息微倦臨流睇歸雲封壤自人力生條在陽春成陰

豈自取為茂屬他辰延詠畱佳賞山水變夕曛

東澗種柳

唐白居易

野性愛栽植植柳水中坻乘春持斧斫裁截而樹之長
短既不一高下隨所宜倚岸埋大榦臨流插小枝松柏
不可待榦楠固難移不如種此樹此樹易榮滋無根亦
可活成陰況非遲三年未離郡可以見依依種罷水邊
憩仰頭閒自思富貴本非望功名須待時不種東谿柳
端坐欲何為

柳堤

明
袁凱

柔條被晴莎密陰覆芳杜逶迤起沙際寂寞連水滸
鷗眠雨未歇鶯叫煙初曙還將竹竿去從爾釣春渚

七言古
附長短句

詠柳

唐
許景先

春色東來渡渭橋青門垂柳百千條長楊西連建章路
漢家林苑紛無數紫花始遍合歡枝遊絲半冒相思樹
春樓初日照南隅柔條垂綠拂金鋪寶釵新梳倭墮髻

錦帶交垂連理襦自憐柳塞淹戎幕銀燭長啼愁夢著
芳樹朝催玉管新春風夜染羅衣薄城頭楊柳已如絲
今年花落去年時折芳遠寄相思曲為惜容華難再持

官渡柳歌送李員外承恩往揚州觀省

唐
獨孤及

君不見官渡河兩岸三月楊柳枝千條萬條色色勝
綠絲花作鉛粉絮葉成翠羽帳此時送遠人悵望春水
上遠客折楊柳依依兩含情夾郎木蘭舟送郎千里行

郎把紫泥書東征覲庭闈脫却貂襜褕新著五彩衣雙
鳳并兩翅將雛東南飛五兩得便風幾日到揚州莫貪
揚州好客行刺淹留郎到官渡頭春蘭已應久殷勤道
遠別為謝大堤柳攀條倘相憶五里一迴首明年柳枝
黃問郎還家否

岸柳

宋
楊萬里

柳梢拂入谿雲陰柳根插入谿水深祇今立岸一敝帚
歸時弄日千黃金人生榮謝亦如此謝何足怨榮何喜

秋霜春雨自四時老夫問柳柳不知

五言律

春池柳

唐太宗

年柳變池臺隋堤曲直迴逐浪絲陰去迎風帶影來疎
黃一鳥啖半翠幾眉開縈雪臨春岸參差間早梅

柳

唐李嶠

楊柳鬱氤氲金堤總翠芬庭前花類雪樓際葉如雲列
宿分龍影芳池寫鳳文短簫何以奏攀折為思君

望漢陽柳色寄王宰

唐李白

漢陽江上柳望客引東枝樹樹花如雪紛紛亂若絲春風傳我意草木度前墀寄謝絃歌宰西來定未遲

柳邊

唐杜甫

只道梅花發那知柳亦新枝枝總到地葉葉自開春紫燕時翻翼黃鸝不露身漢南應老盡灞上遠愁人

賦得長亭柳

唐戴叔倫

濯濯長亭柳陰連灞水流雨搓金縷細煙裊翠絲柔送

客添新恨聽鶯憶舊遊贈行多折取那得到深秋

生春

唐
元稹

何處生春早春生柳眼中芽新纔綻日茸短未含風綠
誤看心重黃驚蠟淚融碧條殊未合愁緒已先叢

柳

唐
李商隱

章臺從掩映郢路更參差見說風流極來當婀娜時橋
迴行欲斷堤遠意相隨忍放花如雪青樓撲酒旗

謹柳

李商隱

已帶黃金縷仍飛白玉花
長時須拂馬密處少藏鴉
看細從他斂腰輕莫自斜
玳梁誰道好偏擬暎盧家

詠柳

唐方干

搖曳惹風吹臨堤軟勝絲
態濃誰為識力弱自難持
學舞枝翻袖呈妝葉展看
如何一攀折懷友又題詩

詠柳

唐吳融

自與鶯為地不教花作媒
細應和雨斷輕祇愛風裁
好拂錦步幃莫遮銅雀臺
灞陵千萬樹日暮別離回

柳花寄人

唐 李建勳

每愛江城裏青春向盡時
一迴新雨歇是處好風吹破
石粘蟲網高樓撲酒旗遙知
陶令宅五樹正離披

折柳亭

宋 孔平仲

楊柳已藏鴉高亭望物華
平時常送客此日自離家別
酒杯何滿征途日欲斜醉行
三十里春思滿鶯花

折楊柳

元 錢惟善

何處好楊柳攀條贈遠行
花飛渡江水客醉踏歌聲秋

色凋榆塞春陰接鳳城一枝不敢折為近亞夫營

楊花

元僧善佳

池塘春欲暮散漫復霏微未得為萍去先來作雪飛帶
泥粘燕嘴和雨點人衣向晚東風急飄零無所歸

綠窗詩

元孫淑

窗裏人初起窗前柳正嬌捲簾衝落絮開鏡見垂條坐
對分金線行防拂翠翹流鶯空巧語倦聽不須調

宮柳

明陳沂

嫋嫋春聲裏陰陰曉色中
縷垂金屋暗花散玉樓空
凝露啼秦苑因風闌楚宮
不知行輦處幾樹近簾櫳

折楊柳

明
楊慎

白雪新年盡東風昨夜驚芳菲
隨處滿楊柳最多情
染作春衣色吹為玉笛聲
如何千里別只贈一枝行

賦得新柳送別

明
謝肇淛

短岸復長隄黃輕綠未齊
曉風吹不定春雪壓常低
草細偏相妬鶯嬌未敢啼
年芳君莫問日落灞陵西

孤柳

明 僧德祥

孤柳在江津年年占早春
上林何限樹此樹獨無鄰
蘸水煙條短啼春露葉新
不知緣甚事只贈遠行人

折楊柳

明 楊文儷

昔去臨歧路柔黃綴樹生
今來歸故里暗綠與樓平
花起輕飄絮條聲巧轉鶯
因看攀折處記取別時情

五言排律

小苑春望宮池柳色

唐 張 翥

小苑春初至，皇衢日更清。
遙分萬條柳，迴出九重城。
隱映龍池潤，參差鳳闕明。
影宜宮雪曙，色帶禁煙晴。
深淺殘陽變，高低曉吹輕。
年光正堪折，欲寄一枝榮。

御溝新柳

唐賈稜

御苑陽和早，章溝柳色新。
託根偏近日，布葉乍迎春。
秀質方含翠，清陰欲庇人。
輕煙度斜景，多露滴行塵。
裊裊堪離贈，依依獨望頻。
王孫如可賞，攀折在芳辰。

御溝新柳

唐馮宿

夾道天渠遠垂絲御柳新千條宜向日萬戶共迎春輕
翠含煙發微音逐吹頻靜看思渡口迴望憶江濱裊裊
分遊騎依依駐旅人陽和如可及攀折在茲辰

御溝新柳

唐陳羽

宛宛如絲柳含黃一望新未成溝上暗且向日邊春嫋
娜方遮水低迷欲醉人託空芳鬱鬱遂溜影鱗鱗弄色
滋宵露垂枝染夕塵夾堤連太液還似映天津

御溝新柳

唐杜荀鶴

律到御溝春溝邊柳色新細籠穿禁水輕拂入朝人日
近韶光早天低聖澤勻谷鶯棲未穩宮女畫難真楚國
空搖浪隋堤暗惹塵何如帝城裏先得覆龍津

垂柳

唐
李商隱

垂柳碧髯茸樓昏雨帶容思量成夜夢束久發春慵梳
洗憑張敞乘騎笑稚恭碧虛隨轉笠紅燭近高春怨目
明秋水愁眉淡遠峯小欄花盡蝶靜院醉醒蛩舊作琴
臺鳳今為藥店龍寶奩拋擲久一任景陽鐘

柳絮

金高廷玉

斷送春歸去，紛飛不暫停。
和風三徑雪，微雨一池萍。
蝶惹依芳草，蜂粘過小庭。
靜宜投隙地，狂欲攪青冥。
得得穿珠戶，時時撲翠屏。
黃鶯枝上語，似與訴飄零。

柳巷

元許有孚

種柳圭塘路，行行便向榮。
雨晴羞眼潤，煙暖細眉橫。
色比金猶嫩，枝看翠易盈。
林疎無繫馬，葉接有啼鶯。
線亂柔條裊，氈鋪落絮平。
尋詩常獨往，送客或同行。
歸院塵

難到還家月每明上通陶令宅下接亞夫營京兆時非
昔高樓夢自驚陽關休疊曲司馬易傷情但恐春回馭
何將酒解醒託根因勝境由徑得嘉名莫訝公休吏詩
成句未精

七言律

柳絮

唐
劉禹錫

飄颻南陌起東鄰漠漠濛濛暗度春花巷暖隨輕舞蝶
玉樓晴拂豔妝人縈迴謝女題詩筆點綴陶公漉酒巾

何處好風偏似雪
隋河堤上古江津

喜小樓西新柳抽條

唐白居易

一行弱柳前年種
數尺柔條今日新
漸欲拂他騎馬客
未多遮得上樓人
須教碧玉羞眉黛
莫與紅桃作麴塵
為報金堤千萬樹
饒伊未敢苦爭春

柳

唐李商隱

江南江北雪初消
漠漠輕黃惹嫩條
灞岸已攀行客手
楚宮先騁舞姬腰
清明帶雨臨官道
晚日含風拂野橋

如線如絲正牽恨王孫歸路一何遙

題柳

唐
溫庭筠

楊柳千條拂面絲綠煙金穗不勝吹香隨靜婉歌塵起
影伴嬌嬈舞袖垂羌笛一聲何處曲流鶯百轉最高枝
千門九陌花如雪飛過宮牆兩不知

詠柳

唐
薛逢

弱植驚風急自傷暮來翻遣思悠悠曾飄綺陌隨高下
敢拂朱欄競短長縈砌乍飛還乍舞撲池如雪又如霜

莫令岐路頻攀折
漸擬垂陰到畫堂

新柳

唐薛能

輕輕須重不須輕
衆木難成獨早成
柔性定勝剛性立
一枝還引萬枝生
天鍾和氣元無力
時遇風光別有情
誰道少逢知己用
將軍因此建雄名

柳

唐羅紹威

妝點青春更有誰
青春常許占先知
亞夫營畔風輕處
元亮門前日暖時
花密宛如飄六出
葉繁何惜借雙眉

交情別緒論多少好向行人贈一枝

詠柳

唐李咸用

日近煙饒還有意東垣西掖幾千株
牽仍別恨知難盡
誇街春光恐更無解引人情長婉約
巧隨風勢強盤紆
天應繡出繁華景處處茸絲惹路衢

折楊柳

唐翁綬

紫陌金堤暎綺羅遊人處處動離歌
陰移古戍迷芳草
花帶殘陽落遠波臺上少年吹白雪
樓中思婦斂青蛾

殷勤攀折贈行客此去關山雨雪多

新柳

唐顧雲

帶露含煙處處垂
綻黃搖綠嫩參差
長隄未見風飄絮
廣陌初憐日映絲
斜傍畫筵偷舞態
低臨妝閣學愁眉
離亭不放到春暮
折盡拂簷千萬枝

柳

唐徐黃

漠漠金條引線微
年年先翠報春歸
解籠飛靄延芳景
不逐亂花飄夕暉
啼鳥噪蟬堪悵望
舞煙搖水自因依

五株名顯陶家後見說辭榮種者稀

詠柳

宋

王十朋

東君於此最鍾情裝點邛邛入畫屏向我無言睂自展
與人非故眼猶青縈牽別恨絲千尺斷送春光絮一亭
葉底黃鸝音更好隔谿煙雨醉時聽

楊花

金

邢安國

細點輕團轉復飄隋家堤岸灞陵橋非綿非絮寒無用
如雪如霜暖不消狂惹客衣知有恨巧尋禪榻故相撩

陂塘回首浮萍滿依舊春春擺翠條

反垂柳短吟

元劉因

偃蹇高松雪謾飛最憐憔悴綠楊枝青絲曾識鶯聲軟
黃葉俄驚馬足遲有分只偷春色早無心要結歲寒知
不應再得東風力更與行人管別離

風柳

元張弘範

澹澹池塘近楚宮綠腰裊娜學盤中亂搖芳草飛輕白
細搭朱欄拂落紅枝上嬌鶯啼恰恰樹邊舞蝶意恁恁

東君應著吹噓力要把春愁一掃空

柳眼

元
謝宗可

媚嫵窺春淺碧浮欲開還閉半顰羞露垂煙縷秋波溜
雨歇風條曉淚收上苑困酣興廢夢灞橋看盡古今愁
五株彭澤回青否應是生花雪滿頭

賦楊花

元
陳基

巷南巷北畫冥冥搖蕩春風未肯停薄命不禁巫峽雨
前身曾化楚江萍已於謝女詩中見更向劉郎曲裏聽

腸斷不堪回首處並人飛過短長亭

楊花

元馬臻

品題曾入百花名長恨濛濛畫不成
灞岸雨餘粘穗濕章臺風暖撲人輕
緩隨流水知無力閒度高樓似有情
想得山齋清影裏亂和蛛網惹柴荆

楊花

明睿宗

金絲縷縷是誰搓時見流鶯為擲梭
春暮絮飛清影薄夏初蟬噪綠陰多
依依弱態愁青女裊裊柔情戀碧波

惆悵路歧行客衆長條折盡欲如何

楊花

明謝晉

飛飛滾滾復揚揚送盡春歸客路傍
雪為有才曾擬詠風因無力却欺狂
妝樓曉起縈簾白水郭晴來滿店香
莫向隋堤凝望眼斷烟斜日正迷茫

糝徑楊花

明李東陽

漠漠楊花帶遠天舞如輕雪糝如氈
行當僻處隨人到風向多時著意偏
地濕似沾前夜雨日斜猶颺隔谿煙

春光到此真須惜莫愛牀頭沽酒錢

宮柳

明
石琚

內裏垂楊自不同萬條柔翠拂瓊宮
葉含華萼樓前雨枝帶朝元閣上風
望入畫眉情正切轉來黃鳥語初工
一般灞水橋頭綠日日行人惆悵中

武昌柳

明
錢希言

容顏消息轉悠悠暗憶飛綿上翠樓
謝氏女郎空有賦盧家少婦不知愁
陰疑灞水橋邊合絲學靈和殿裏柔

若向吳昌折春色綠條畱取繫歸舟

詠楊柳

明
徐桂

掩映朱樓蔭曲池霏微芳樹早含滋
枝枝水畔纔舒眼
葉葉風前乍展眉
未許漫天輕作絮
且教拂地有垂絲
征人遠道那堪折
休共梅花笛裏吹

其二

條風一夜乍回枯
黛色和烟半有無
玄灞柔條堪繫馬
白門疎影不藏烏
樓頭寒暎羅衣薄
曲裏風驚紫塞孤

春水綠波春草碧等閑芳歲莫教徂

柳

明
朱謀晉

二十八星中有名千枝萬樹綰離情暖風拂地條初弱
寒雨連空葉漸生半倚紅亭江北岸低藏粉堞漢南城
綠陰高處春光暮吹送新蟬四五聲

煙柳

明
朱之蕃

隋隄吳苑鎖春光淡抹輕籠萬綠楊朝暮晴陰從變幻
眼睜顰笑暗相將鶯梭忙織綃紋薄燕剪平分匹練長

不辨離亭曾折處
遙連芳草斷柔腸

沾泥絮

朱之蕃

雨撲香塵紫陌融
楊花無力奈春風
憑虛到底升還墜
浪迹從前西復東
漫擬鋪氍毹盈徑路
無緣點硯入簾櫳
萍繁櫟弱皆乘化
心事枯禪未許同

應制賦禁中柳絮

明
潘緯

日暖長楊露乍晞
樓臺無處不霏霏
纔隨漢苑春風起
忽作梁園暮雪飛
案上花生供奉筆
墀頭影落侍臣衣

不因賦質輕微甚那得吹噓到禁闈

詠湖上新柳

明
李奎

依依弱柳不勝春
裊裊垂條向水濱
奈可輕盈愁少婦
豈堪攀折贈離人
煙消翡翠眠初起
風折鴉黃舞乍新
猶喜芳心未成絮
肯將眉黛向人顰

柳

明
申時行

泥融沙漲雪痕消
到處芳菲著舊條
隔水半藏青雀舫
迎風斜倚赤欄橋
樓頭人醉初橫笛
灞口春陰不上潮

陶令柴桑歸去久五株門外已飄搖

五言絕句

賦得臨池柳

唐太宗

岸曲絲陰聚波搖帶影疎還將眉裏翠來就鏡中舒

柳浪

唐裴迪

暎池同一色逐吹散如絲結陰既得地何謝陶家時

題平陽郡汾橋邊柳樹

唐岑參

此地曾居住今來宛似歸可憐汾上柳相見也依依

新柳

唐司空曙

全欺芳蕙晚似妬寒梅
疾撩亂發青條春風來幾日

山徑柳

唐顧況

宛轉若遊絲淺深栽綠掩
年年立春後即被啼鶯占

柳花詞

唐劉禹錫

開從綠條上散逐香風遠
故取花落時悠揚占春晚

其二

輕飛不假風輕落不委地
繚亂舞晴空發人無限思

柳谿

唐韓愈

柳樹誰人種行行夾岸高
莫將條繫纜著處有蟬號

柳下暗記

唐李商隱

無奈巴南柳千條
傍吹臺更將黃暎白擬作杏花媒

途中柳

唐李中

翠色晴來近長亭路去遙
無人折煙縷落日拂谿橋

邨居

元劉因

黃昏雨氣濃喜色滿南畝
誰知一夜風吹放門前柳

渡江

明張以寧

幾載途中月，窺愁酒半酣。
送人楊柳色，今日是江南。

七言絕句

詠柳

唐賀知章

碧玉妝成一樹高，萬條垂下綠絲絛。
不知細葉誰裁出，二月春風似剪刀。

襄陽寒食寄字文籍

唐竇鞏

煙水初銷見萬家，東風吹柳萬條斜。
大堤欲上誰相問，

馬踏春泥半是花

楊柳枝

唐
劉禹錫

南陌東城春早時
相逢何處不依依
桃紅李白皆誇好
須得垂楊相發揮

其二

御陌青門拂地垂
千條金縷萬條絲
如今綰作同心結
將贈行人知不知

其三

城外春風吹酒旗
行人揮袂日西時
長安陌上無窮樹
唯有垂楊管別離

其四

輕盈嫋娜占年華
舞榭妝樓處處遮
春盡絮飛留不得
隨風好去落誰家

池上絮

唐
韓愈

池上無風有落暉
楊花暗後自飛飛
為將纖質凌清鏡
灑却無窮不得歸

折楊柳

唐
楊巨源

水邊楊柳麴塵絲
立馬煩君折一枝
惟有春風最相惜
殷勤更向手中吹

賦得灞岸柳畱辭鄭員外

楊巨源

楊柳含煙灞岸春
年年攀折為行人
好風倘惜低枝便
莫遣青絲掃路塵

華清宮前柳

唐
王建

楊柳宮前忽地春
在先驚動探春人
曉來唯欠驪山雨

洗卻枝頭綠上塵

憶江柳

唐白居易

曾栽楊柳江南岸一別江南兩度春
遙憶青青江岸上不知攀折是何人

楊柳枝詞

白居易

陶令門前四五樹亞夫營裏百千條
何似東都正二月黃金枝映洛陽橋

其二

依依嫋嫋復青青勾引春風無限情
白雪花繁空撲地
綠絲柔弱不勝鶯

柳絕句

唐杜牧

數樹新開翠影齊倚風情態被春迷
依依故國樊川恨
半掩邨橋半掩谿

東亭柳

唐趙嘏

拂水斜煙一萬條幾隨春色倚河橋
不知別後誰攀折
猶自風流勝舞腰

柳

唐

李商隱

柳映江潭底有情望中頻遣客心驚
巴雷隱隱千山外更作章臺走馬聲

離亭賦得折楊柳

李商隱

含煙惹霧每依依萬緒千條拂落暉
為報行人休盡折半畱相送半迎歸

折楊柳

唐

薛能

華清高樹出離宮南陌柔條帶暖風
誰見輕陰是良夜

瀑泉聲畔月明中

其二

洛橋晴影覆江船
羌笛秋聲濕塞煙
閒想習池公宴罷
水蒲風絮夕陽天

其三

嫩綠輕懸似綴旒
路人遙見隔宮樓
誰能更近丹墀種
解播皇風入九州

其四

窗外齊垂旭日初樓邊輕暖好風徐遊人莫道我無益
桃李清陰却不如

其五

衆木猶寒獨早青御溝橋畔曲江亭陶家舊日應如此
一院春條綠繞廳

折楊柳

唐
段成式

玉樓煙薄不勝芳金屋寒輕翠帶長公子驂騑往何處
綠陰堪繫紫游韁

楊柳枝

唐
溫庭筠

蘇小門前柳萬條
金線拂平橋
黃鶯不語東風起
深閉朱門伴細腰

其二

金縷毵毵碧瓦溝
六宮眉黛惹春愁
曉來更帶龍池雨
半拂欄干半入樓

其三

御柳如絲映九重
鳳凰窗柱繡芙蓉
景陽樓畔千條露

一面新妝待曉鐘

楊柳枝詞

唐韓琬

枝闌纖腰葉闌睂春來無處不如絲
灞陵原上多離別
少有長條拂地垂

柳

唐李山甫

灞岸江頭臘雪消東風偷軟入纖條
春來不忍登樓望
萬架金絲著地嬌

其二

受盡風霜得到春一條條是逐年新尋常送別無餘事
爭忍攀將過與人

其三

長恨陽和也世情把香和豔與紅英家家只是栽桃李
獨自無根到處生

其四

從來只是愛花人楊柳何曾占得春多向客亭門外立
與他迎送往來塵

其五

無賴秋風斗覺寒
萬條煙罩一時乾
遊人若要春消息
直向江頭臘後看

楊柳枝壽杯詞

唐
司空圖

桃源仙子不須誇
聞道唯栽一片花
何似浣紗谿畔住
綠陰相間兩三家

其二

處處縈空百萬枝
一枝枝好更題詩
隔城遠岫招行客

便與朱樓當酒旗

其三

錦城分得暎金溝
兩岸年年引勝遊
若似松篁須帶雪
人間何處認風流

其四

大堤時節近清明
霞襯煙籠繞郡城
好是梨花相暎處
更勝松雪日初晴

其五

聖主千年樂未央御溝金翠滿垂楊
年年織作昇平字
高映南山獻壽觴

柳

司空圖

誰家按舞傍池塘已見繁枝嫩眼黃
謾說早梅先得意
不知春力暗分張

其二

似擬凌寒妬早梅無端弄色傍高臺
折來未有新枝長
莫遣佳人更折來

柳

唐
羅隱

一簇青煙鎖玉樓，半垂欄畔半垂溝。
明年更有新條在，繞亂春風卒未休。

柳

羅隱

灞岸晴來送別頻，相偎相倚不勝春。
自家飛絮猶無定，爭解垂絲絆路人。

折楊柳

唐
崔塗

朝朝車馬如蓬轉，處處江山待客歸。
若使人間少離別，

楊花應合過春飛

柳

唐
鄭谷

半煙半雨江橋畔
暎杏暎桃山路中
會得離人無限意
千絲萬絮惹春風

楊花

唐
吳融

不關穠華不占紅
自飛晴野雪濛濛
百花長恨風吹落
唯有楊花獨愛風

柳

唐
韓偓

一籠金線拂灣橋幾被兒童損細腰無奈靈和標格在
春來依舊裊長條

楊柳枝詞

唐
崔道融

霧撚煙搓一索春年年長似染來新應須喚作風流線
繫得東西南北人

柳

唐
李中

春來無樹不青青似共東風別有情閒憶舊居湓水畔
數枝煙雨屬啼鶯

其二

最愛青青水國中
莫愁門外間花紅
纖纖無力勝春色
撼起啼鶯恨晚風

柳

唐
裴說

高拂危樓低拂塵
灞橋攀折一何頻
思量卻是无情樹
不解迎人只送人

楊柳枝詞

唐
孫鮪

靈和風暖太昌春
舞線搖絲向昔人
何似曉來江雨後

一行如畫隔遙津

其二

十首當年有舊詞
唱青歌翠幾無遺
未曾得向行人道
不為離情莫折伊

柳枝詞

唐
成彥雄

東君愛惜與先春
草澤無人處也新
委囑露華并細雨
莫教遲日惹風塵

其二

綠楊移傍小亭栽，便擁濃煙撥不開。
誰把金刀為刪掠，放教明月入窗來。

柳枝詞

座中應制

宋徐鉉

金馬辭臣賦小詩，梨園弟子唱新詞。
君恩還似東風意，先入靈和蜀柳枝。

其二

百草千花共待春，綠楊顏色最驚人。
天邊雨露年年有，上苑芳華歲歲新。

其三

長愛龍池二月時
參參金線弄春姿
假饒葉落枝空後
更有梨園笛裏吹

其四

綠水成文柳帶搖
東風初到不鳴條
龍舟欲過偏畱戀
萬縷輕絲拂御橋

其五

百尺長橋浣麴塵
詩題不盡畫難真
憑君折向人間種

還似君恩處處春

其六

風暖雲開晚照明翠條深映鳳凰城
人間欲識靈和態聽取新詞玉管聲

其七

醉折垂楊唱柳枝金城三月走金羈
年年為愛新條好不學蒼華也似絲

其八

新春花柳競芳姿偏愛垂楊拂地枝
天子徧教詞客賦
宮中要唱洞簫詞

其九

凝碧池頭蘸翠連鳳凰樓畔簇晴煙
新詩欲詠知難詠
說與雙成入管絃

其十

侍從甘泉與未央移舟偏要近垂楊
櫻桃未綻梅花老
折得柔條百尺長

柳枝辭

徐鉉

把酒憑君唱柳枝也從絲管遞相隨逢春只合朝朝醉
記取秋風葉落時

其二

夾岸朱欄柳映樓綠波平慢帶花流歌聲不出長條密
忽地風回見綵舟

其三

濛濛堤岸柳含煙疑是陽和二月天醉裏不知時節改

漫隨兒女打鞦韆

其四

此去仙源不是遙
垂楊深處有朱橋
共君同過朱橋去
密暎垂楊聽洞簫

柳絮

宋韓琦

絮雪紛紛不自持
亂愁縈困滿春暉
有時穿入花枝過
無限蜂兒作隊飛

再賦柳枝詞

韓琦

曲江風暖曉陰斜，翠色相宜拂鈿車。
自是春眠慵未起，日高人困又飛花。

其二

葉葉新長約黛蛾，絲絲輕軟任風梭。
啼鶯便學歌喉轉，知是春來舞意多。

和春卿學士柳枝詞

韓琦

樓前輕雪未全銷，偷得春光入嫩條。
似向東風猶綽約，可能渾忘舞時腰。

其二

章街風曉起新眠
寒食輕陰未雨天
無限青絲拂遊騎
一生芳意負金鞭

楊柳

宋
王安石

楊柳杏花何處好
石梁茅屋雨初乾
綠垂靜路要深駐
紅寫清波得細看

柳絮

宋
陳與義

柳送腰肢日幾迴
更教飛絮舞樓臺
顛狂忽作高千丈

風力微時穩下來

新柳

宋楊萬里

柳條百尺拂銀塘且莫深青只淺黃未必柳條能蘸水
水中柳影引他長

楊花

宋樓鑰

雨壓輕寒春較遲春深不見柳綿飛忽然飛入閒庭院
疑是故人何處歸

其二

柳綿無數糝枝頭日暖隨風撲畫樓萬象可觀惟有雪
喜看晴晝滿空遊

其三

為我輕攀綠柳枝帶花低護又攜歸日長深院微風動
要著鬆綿當面飛

柳葉詞

宋
徐照

嫩葉吹風不自持淺黃微綠映清池玉人未識分離恨
折向堂前學畫眉

春晚

宋 僧道潛

曉風池沼水瀾翻
春盡淮南麥秀寒
院落無人日停午
柳花如雪滿闌干

楊柳

金 高士談

魏王堤暗雨垂垂還似春殘欲別時
傳語西風且停待
黛殘黃淺不禁吹

楊花

高士談

來時官柳萬絲黃
去日飛毬滿路傍
我比楊花更飄蕩

楊花只是一春忙

春日

金劉勳

粉蝶耽香夢正迷黃蜂和蜜計何癡
小軒無事誰如我卧看楊花點硯池

春柳應制得城字

金劉微

翠細勻圓綠線輕著行排立弄新晴
更看三月春風裏散作輕花滿鳳城

鄉郡雜詩

金元好問

一溝流水幾橋橫
岸上人家種柳成
來歲春風一千樹
綠煙和雨暗重城

楊柳

元好問

楊柳青青溝水流
鶯兒調舌弄嬌柔
桃花記得題詩客
斜倚春風笑不休

南園新柳

元 淮

萬縷依依帶嫩黃
斜穿紅杏弄疎狂
晝長舞得東風困
半倚鞦韆半拂牆

賦柳

元 蒲道源

枯樹生萋色已嬌低垂江岸映谿橋東君不惜黃金縷
散作春風十萬條

縣下鑿池種柳成聚晨起視水深五寸而草樹
承夜雨後蒼翠鬱然可愛戲題廳柱

蒲道源

檳榔池上芭蕉雨更種垂楊十六株中有玉堂蕭散吏
檢書正對輞川圖

楊柳邨

元 張伯淳

千絲萬縷拂章臺陌上行人幾去來
何事結根荒寂處
東風青眼為誰開

清涼亭衰柳

元 薩都拉

清涼亭上幾株霜脫葉難遮
夕照光依舊
明年二三月
小金山下看鵝黃

春日獨坐

元 吳師道

茶煙淡淡風前少
庭葉沈沈雨後添
何處楊花念幽獨

殷勤入室更穿簾

飛絮

元
楊維禎

春風門巷欲無花絮起
晴風落又斜飛入畫簾空
惹恨不知楊柳在誰家

柳花詞

元
張昱

攔馬牆西欲暮春
花飛不復過中旬
倚天樓閣晴光裏
爭撲珠簾不避人

其二

滿院長條散綠陰誰家門戶碧沈沈地衣不許重簾隔
雪白花鋪一寸深

偶成

元張雨

黃篋樓中枕書卧雙鶴交鳴驚夢破青天墜下白雲來
卷簾一陣楊花過

見柳詠懷

元馬臻

畫船曾繫柳邊橋歌舞升平樂意饒事去却憐橋畔柳
春來猶學舞兒腰

楊柳枝

明
朱有燉

春來折盡更逢春
舊折長條又復新
惟有行人相送別
今年不是去年人

其二

莫折柔絲五尺金
一絲絲繫別離心
春風吹到無情處
亂滾香綿結畫陰

柳枝歌

朱有燉

蘇小門前萬縷垂
白家園內兩三枝
聽歌看舞人何在

惟有東風展翠睂

其二

三月風和散麴塵
枝枝垂地每傷神
為君繫得春心住
忍折長條送遠人

其三

宛轉千條冒晚風
拖煙帶雨渭城東
征衫點得輕輕絮
寄入陽關曲調中

楊柳枝詞

明
劉基

多事垂楊管送迎長條折盡短條生不知幾許東風裏
猶帶輕煙冒晚晴

楊柳詞

明方行

韶華無限暗中消搖蕩春光幾萬條却怪晚來風定後
雪花飛滿赤欄橋

楊柳枝詞

明胡儼

畫簾風動影絲絲曳綠搖金晝景遲睡起倚欄看蛺蝶
鶯聲只在最高枝

西湖柳枝詞

明瞿佑

西子湖邊楊柳枝，千條萬縷盡垂絲。
東風日暮花如雪，飛入雕牆兩不知。

柳枝詞

明楊慎

結根元自在青冥，裊裊依依映紫庭。
怪得古來天帝醉，柳邊高揭酒旗星。

柳枝詞

明胡安

惜取楊枝暮復朝，未經攀折欲魂消。
閑中喜得無離別，

緩步春風灞水橋

柳

明
黃姬水

南陌香塵逐馬蹄
東園桃李共成蹊
春來樹樹花先發
獨有垂楊葉早齊

題柳

明
張鳳翼

千絲千樹拂天津
三起三眠出上林
何似小桃低曲處
一枝斜覆玉窗深

柳枝詞

明
章士雅

長淮渡頭楊柳春長淮市上酒旗新繫船沽酒折楊柳
還是去年西渡人

柳枝詞

明
吳鼎芳

綠陰如雨萬條斜啼罷朝鶯又晚鴉盡日春風無別意
只吹花點過西家

題便面畫新柳

明
李日華

雪消野水半融泥凍柳森森態未齊昨夜一番春雨好
淡黃金色滿湖堤

南山雜詠

明僧懷渭

暮春三月風日妍
亂折花枝送酒船
西嶺山光青浸水
南池柳色綠生烟

柳塘

明僧永瑛

千樹垂絲兩岸煙
綠波春雨白鷗天
江鄉不近章臺路
畱得長條繫釣船

御定佩文齋詠物詩選卷二百八十九

欽定四庫全書薈要卷一萬八千九百十二

集部

御定佩文齋詠物詩選卷二百九十

檉類

五言古

檉

梁簡文帝

凌寒競貞節負雪固難虧
無慚雲母桂詎減珊瑚枝

有木詩八首

錄一

唐白居易

有木名水檉遠望青
童童根株非勁挺
柯葉多蒙龍彩

翠色如柏鱗皴皮似松為同松柏類得列嘉樹中枝弱
不勝雪勢高常懼風雪壓低還舉風吹西復東柔芳甚
楊柳早落先梧桐唯有一堪賞中心無蠹蟲

檉

明
吳寬

讀詩識其名誰謂材無用西戎每渡河此木能載重所

以人字之

一名西河柳

豈在作梁棟兩株倚東籬計亦七年

種相對垂青絲驀地來二仲

七言古

魏倉曹東堂桤樹

唐李頎

愛君雙桤一樹奇，千葉齊生萬葉垂。
長頭拂石帶煙雨，獨立空山人莫知。
攢青蓄翠陰滿屋，紫穗紅英曾斷目。
洛陽墨客遊雲間，若到麻源第三谷。

七言絕句

邨居

金馬定國

五月南風化蟪蛄，野塘晚筍未成蒲。
桤花落盡紅英細，沙渚鴛鴦半引雛。

暮春雜詠

元僧善住

滿地輕陰野水新
粉牆額額有凝塵
一雙戲蝶來書幌
猶繞殘花覓舊春

御定佩文齋詠物詩選卷二百九十

欽定四庫全書薈要卷一萬八千九百十三

集部

御定佩文齋詠物詩選卷二百九十一

烏柏類

七言絕句

水亭秋日偶書

宋林逋

巾子峯頭烏柏樹微霜未落已先紅
憑欄高看復低看半在石池波影中

行田

宋方岳

屋頭烏柏午陰密牛與牧童相對眠不是官中催稅急
十年前已學耕田

寄高彬

明孫蕢

條風吹綠滿蟾谿蠟屐行春日向西獨木橋邊烏柏樹
鵲鳩飛上上頭啼

湖邨晚眺

明樊阜

邨南邨北總西風柏葉先霜淺著紅野鳥飛邊堪入畫
數家籬落夕陽中

征人早行圖

明
楊慎

杜鵑花下杜鵑啼
烏柏樹頭烏柏棲
不待鳴雞度關去
夢中征馬尚聞嘶

御定佩文齋詠物詩選卷二百九十一

欽定四庫全書薈要卷一萬八千九百十四

集部

御定佩文齋詠物詩選卷二百九十二

冬青類

五言律

洞靈觀冬青

唐許渾

雪霰不凋色兩株交石壇
未秋紅實淺經夏綠陰寒
露重蟬鳴急風多鳥宿難
何如西禁柳晴舞玉闌干

七言絕句

漢宮曲

唐韓翃

五柞宮中過臘看萬年枝上雪花殘綺窗夜閉玉堂靜
素綆朝垂金井寒

訪隱者不遇

唐李商隱

秋水悠悠浸野扉夢中來數覺來稀玄蟬聲盡黃葉落
一樹冬青人未歸

宛陵館冬青樹

唐趙嘏

碧樹如煙覆晚波清秋欲盡客重過故園亦有如煙樹

鴻雁不來風雨多

夏晝小雨

宋戴昺

小牀蘄簟展琉璃窗外新篁一尺圍
正午雲橋疎雨過
冬青花上蜜蜂歸

田家

元方夔

晌午鴉鴉響踏車那邊叢薄有人家
老農歇熟藤陰下
一樹冬青落細花

畫

明張羽

疎散元非用世才日高林戶尚慵開為憐湖上青山好
行到冬青樹底來

御定佩文齋詠物詩選卷二百九十二

欽定四庫全書薈要卷一萬八千九百十五

集部

御定佩文齋詠物詩選卷二百九十三

銀杏類

五言古

永叔內翰遺李太博家新生鴨脚

宋
梅堯臣

北人見鴨脚南人見胡桃識內不識外疑若橡栗韜鴨
脚類綠李其名因葉高吾鄉宣城郡多以此為勞種樹

三十年結子防山獮剝核手無膚持置宮省曹今喜生
都下薦酒壓葡萄初聞帝苑夸又復主第褒累累誰採
掇玉椀上金黿金黿文章宗分贈我已叨豈無異鄉感
感此微物遭一世走塵土鬢顛得霜毛

梅聖俞寄銀杏

宋 歐陽修

鷺毛贈千里所重以其人鴨脚雖百箇得之誠可珍予
聞得之誰詩老遠且貧霜野橘林實京師寄時新封包
雖甚微採掇皆躬親物貴以人貴人賢棄而淪開緘重

嗟惜詩以報慇懃

和聖俞鴨脚子

歐陽修

鴨脚生江南名實本相浮絳囊因入貢銀杏貴中州致
遠有餘力好奇自賢侯因令江上根結實華門秋始摘
纔三四金奩獻凝旒公卿不及識天子百金酬歲久子
漸多累累枝上稠主人名好客贈我比珠投博望昔所
徙葡萄安石榴想其初來時厥價與此侔今已徧中國
籬根及牆頭物性久雖在人情逐時流惟當記其始後

世知來由是亦史官法豈徒續君謠

七言律

謝濟之送銀杏

明吳寬

錯落朱提數百枚洞庭秋色滿盤堆
霜餘亂摘連柑子雪裏同煨有芋魁
不用盛囊書復寫料非鑽核意無猜
却愁佳惠終難繼乞與山中幾樹栽

七言絕句

銀杏

宋楊萬里

深灰淺火畧相遭小苦微甘韻最高未必雞頭如鴨脚
不妨銀杏作金桃

御定佩文齋詠物詩選卷二百九十三

欽定四庫全書薈要卷一萬八千九百十六

集部

御定佩文齋詠物詩選卷二百九十四

木瓜類

七言古

瓜洲謝李德載寄蜂兒木瓜筆

宋

張耒

瓜洲蕭索秋江渚西風江岸殘紅舞
津亭永夜守青燈客睡朦朧聽江雨
清樽曉酌遣懷抱但恨鬱鬱將誰語

敲門忽得故人書
洗手開緘見睂宇
蜂兒肥膩愈風痺
木瓜甘酸輕病股
銛鋒皓管見還媿
老去筆硯生塵土
壯歸飄泊亦何事
篙工已束橫江櫓
天寒應客太昊墟
當遣何人具雞黍

五言律

木瓜園

宋文同

驅馬下高岡
吟鞭只自揚
谿山過新霽
草木發清香
浩蕩來江閣
縈紆去棧長
春風吹欲盡
樽酒歎何嘗

七言絕句

宮中詞

元張昱

宮羅支請銀霜褐
徹夜房中自剪裁
明日看花西內去
牡丹臺畔木瓜開

御定佩文齋詠物詩選卷二百九十四

欽定四庫全書薈要卷一萬八千九百十七

集部

御定佩文齋詠物詩選卷二百九十五

木槿花類

五言古

詠槿

唐

李白

園花笑芳年池草豔春色猶不如槿花嬋娟玉堦側芬
榮何天促零落在瞬息豈若瓊樹枝終歲長翕艷

木槿

元

舒頔

愛花朝朝開憐花暮即落顏色雖可人賦質無乃薄亭
亭暎清池風動亦綽約彷彿芙蓉花依稀木芍藥炎天
衆芳凋而此獨凌鏤慰目聊娛情蒼松在巖壑

白木槿

舒頔

素質不自媚開花向秋前澹然超羣芳不與春爭妍涼
夜弄清影縞衣照嬋娟佳人分寂寞零落祇自憐鮮鮮
碧雲樹皎皎萬玉懸朝開暮還落物理乃自然嗟彼擁
腫木徒爾全天年

五言律

翫槿花

唐
羊士諤

何乃詩人興妍詞屬薜華風流感異代窈窕比同車凝
豔垂清露驚秋隔絳紗蟬鳴復蟲思惆悵竹陰斜

槿花

唐
李商隱

燕體傷風力雞香積露文殷鮮一相雜啼笑兩難分月
裏寧無姊雲中亦有君三清與仙島何事亦離羣

其二

珠館薰燃久玉房
梳掃餘燒蘭才作燭
襪錦不成書本以
亭亭遠翻嫌脉脉
疎迴頭問殘照殘
照更空虛

朱槿花

李商隱

蓮後紅何患梅先白
莫誇纔飛建章火
又落赤城霞不卷
錦步障未登油壁
車日西相對罷休
澣向天涯

木槿

唐楊凌

羣玉開雙槿丹榮對絳紗
含煙疑出火隔雨怪舒霞
向晚爭辭葉迎朝鬪發花
非關後桃李為欲繼年華

槿樹

宋謝翱

白犬吠行人西風杆白新洗香澄宿水曝髮向秋隣野
草依溝盡宮花入帽頻人家小門徑憐爾獨相親

七言律

道傍槿籬

宋楊萬里

夾道疎籬錦作堆朝開暮落復朝開抽心拒妝輕拖糝
近蒂蘸脂蘸抹腮占破半年猶道少何曾一日不芳來
花中却是渠長命換舊添新底用催

木槿

明陸深

曾聞鄭女詠同車更愛丰姿淡有花欲傍莓苔橫野渡
似將鉛粉鬪朝華品題從此添高價物色仍煩築短沙
漫道春來李能白秋風一種玉無瑕

五言絕句

木槿

唐楊凌

綠樹競扶疎紅姿相照灼不學桃李花亂向春風落

槿花

唐崔道融

槿花不見夕一日一回新東風吹桃李須到明年春

木槿花

明張以寧

朝昏看開落一笑小窗中別種蟠桃子千年一度紅

七言絕句

題槿花

唐戎昱

自用金錢買槿栽二年方始得花開鮮紅未許佳人見
蝴蝶爭知早到來

送王貞

唐劉商

清揚玉潤復多才邂逅佳期過早梅
槿花亦可浮杯上
莫待東籬黃菊開

白槿花

唐
白居易

秋薜晚英無豔色何因栽種在人家
使君自別羅敷面
爭解回頭愛白花

朱槿花

唐
李紳

瘴煙長暖無霜雪槿豔繁花滿樹紅
每歎芳菲四時厭
不知開落有春風

誇紅槿

唐徐凝

誰道槿花生感促可憐相繼半年紅
何如桃李無多少併打千枝一夜風

洞口人家

元郭鈺

松樹迴環四五家機梭長日響
咿啞西風裊得胭脂色偏與籬東木槿花


秋日即事

明劉基

槿花數樹夕陽時收拾秋光在短籬
自紫自紅還自碧

祇應獨有暮蟬知

御定佩文齋詠物詩選卷二百九十五



總校官庶吉士臣侍朝

校對官修撰臣張書勲

謄錄監生臣彭希韓

欽定四庫全書薈要

集部

御定詠物詩選卷二百九十六

詳校官原任主事臣李斯咏



欽定四庫全書薈要卷一萬八千九百十八

集部

御定佩文齋詠物詩選卷二百九十六

桃花類

五言古

初桃

梁簡文帝

初桃麗新彩照地吐其芳枝間畱紫燕葉裏發輕香飛
花入露井交榦拂華堂若映窗前柳懸疑紅粉粧

奉和詠龍門桃花

北齊

蕭慤

舊聞開露井今見植龍門樹少知非塞花高異少源論
詩應未發故欲影歸軒祇言經摘罷猶勝逐風翻

晚桃

唐
劉長卿

四月深澗底桃花方欲然寧知地勢下遂知春風偏此
意頗堪惜無言誰與傳過時君未賞空媚幽林前

桃花

宋
韓 駒

桃花如美人服飾靚以豐徘徊顧香影似為悅已容數
枝有餘妍窈窕禁苑中

桃園春曉

明仁宗

曙光猶未分
芳園露華炫
碧桃千萬樹
鮮妍如錦綉
隔林鶯語滑
兩兩間闌轉
掖垣將啓扉
漏箭傳聲遠
花底候宮車
更覺東風軟

七言古

桃源行

唐王維

漁舟逐水愛山春
兩岸桃花夾去津
坐看紅樹不知遠
行盡青谿不見人
山口潛行始隈隩
山開曠望旋平陸

遙看一處攢雲樹近入千家散花竹樵客初傳漢姓名
居人未改秦衣服居人共住武陵源還從物外起田園
月明松下房櫳靜日出雲中雞犬喧驚聞俗客爭來集
競引還家問都邑平明閭巷掃花開薄暮漁樵乘水入
初因避地去人間及至成仙遂不還峽裏誰知有人事
世中遙望空雲山不疑靈境難聞見塵心未盡思鄉縣
出洞無論隔山水辭家終擬長游行自謂經過舊不迷
安知峰壑今來變當時只記入山深青谿幾曲到雲林

春來遍是桃花水不辨仙源何處尋

南家桃

唐
元稹

南家桃樹深紅色日照露光看不得樹小花狂風易吹
一夜風吹滿牆北離人自有經年別眼前落花心歎息
更待明年花滿枝一年迢遞空相憶

五言律

詠桃

唐
太宗

禁苑春暉麗花蹊綺樹粧綴條深淺色點露參差光向

日分千笑迎風共一香如何仙嶺側獨秀隱遙芳

桃

唐李嶠

獨有成蹊處穠花發井旁山風凝笑臉朝露泣啼粧隱
士顏應改仙人路漸長還欣上林苑千歲奉君王

廨中見桃花南枝已開北枝未發因寄杜副端

唐

劉長卿

何意同根本開花每後時應緣去日遠獨自發春遲結
實恩難忘無言恨豈知年光不可待空羨向南枝

小桃園

唐 李商隱

竟日小桃園休寒亦未暄坐鶯當酒重送客出牆繁啼
久艷粉薄舞多香雪翻猶憐未圓月先出照黃昏

鄰家桃花

明 高 啓

春色東家出相窺似有心曲垣遮自短別院閉還深影
動疑人折香搖妒蝶尋好風時解意吹片拂羅襟

桃

明 方九功

一曲桃園樹平沙十里春落花紅勝錦藉草綠如茵野

興邀詩伴邨沽覓酒鄰怕逢漁父問疑是避秦人

五言排律

桃花

唐薛能

秀氣自天鍾千年宣易逢開齊全未落繁極欲相重冷
濕朝如淡晴乾午更濃風光新社燕時節舊春農離落
歌臨竹亭臺盛間松亂緣堪羨蟻深入不如蜂有影宜
暄煦無言自治容洞連非俗世谿靜接仙蹤子熟河應
變根盤土已封西王潛愛惜東朔盜過從醉席眠英好

題詩戀景慵芳菲聊一望何必在臨邛

七言律

晚桃花

唐白居易

一樹紅桃亞拂池竹遮松蔭晚開時
非因斜日無由見不是閒人豈得知
寒地生材遺拔易貧家養女嫁常遲
春深欲落誰憐惜白侍郎來折一枝

緋桃

唐唐彥謙

短牆荒圃四無鄰烈火緋桃照地春
坐久好風休掩袂

夜來微雨已沾巾敢同俗態期青眼似有微詞動絳脣
盡日更無鄉井念此時何必見秦人

緋桃花

唐
李咸用

茫茫天意為誰留深染天桃備勝遊未醉已知醒後憶
欲開先為落時愁癡蛾亂撲燈難滅躍鯉傍驚電不收
何事梨花空似雪也稱春色是悠悠

桃花

唐
李中

祇應紅杏是知音灼灼偏宜間竹陰幾樹半開金谷曉

一谿齊綻武陵深
艷舒百葉時皆重
子熟千年事莫尋
誰步宋牆明月下
好香和影上衣襟

館中桃花

宋孔武仲

蓬壺深絕鑱芳菲
初見仙桃第一枝
天近自應風景別
春長莫恨化工遲
相重朱戶人稀到
半掩香苞蝶未知
想像江南今盛發
亦經頻雨稍離披

桃花

元馬臻

淺碧繁紅又滿枝
化工消息本無機
艷滋曉露鶯搖落

香漬春泥燕掠歸金谷園中芳草在
玄都觀裏昔人非
自從雲隔天台路劉阮如今夢亦稀

碧桃

元
黃石翁

洗盡嬌紅出翠帷玉人無語背斜暉
綠華前度通仙譜
天水何年染素衣宴罷瑤池春夢斷
影寒姑射夜深歸
禁煙時節多風雨莫遣繁英一片飛

詠谿上新栽桃

明
袁凱

桃樹移栽近淺沙呼兒挿竹護欹斜
秋來擬喫垂垂實

春到還看浩浩花
旋置酒旗深處挂
更將漁艇密邊遮
老夫未是文章手
故少新詩對客誇

桃

明
吳寬

城南春色曉移來
粧點園林錦作堆
嫩綠不須將葉認
淡紅已是當花開
玄都自發劉郎詠
幽谷還教謝判裁
此日公門深似許
畫長高鎖正掄材

桃花

明
申時行

萬山廻合似天台
二月桃花已徧開
映水却疑乘浪煖

緣崖故是倚雲栽，亂紅飛雨沾衣袂。
碎錦分霞入酒杯，漫道武陵仙路遠。
探奇有客問津來。

詠紅白桃花

明陳鴻

雙艷如從露井看，妝分濃淡映雕欄。
玉膚中酒冰綃薄，粉面窺人鏡障寒。
杏雨並隨窗外度，梨雲同入帳中殘。
膽瓶不是餘香在，定訝珊瑚間木難。

五言絕句

入百丈澗見桃花晚開

唐劉長卿

百丈深澗裏過時花欲妍應緣地勢下遂使春風偏

桃塢

唐
韋處厚

噴日舒紅錦通蹊茂綠陰終期王母摘不羨武陵深

桃塢

唐
張籍

春塢桃花發多將野客遊日西殊未散看望酒缸頭

嘲桃

唐
李商隱

無賴天桃面平明露井東春風為開了却擬笑春風

桃

宋
王十朋

在處飄紅雨臨窗照夕陽何時清禁裏一醉伴仙郎

桃蹊

宋朱子

澗裏春泉響種桃泉上頭爛紅紛委地未肯出山流

桃

宋崔德符

殘夜迷春曉天桃怯夜寒何人未粧洗先傍玉闌干

壺中二色桃花

明楊基

素頰映紅腮西園共折來憐渠竟先落知是最先開

七言絕句

侍宴桃花園詠桃花應制

唐李乂

綺萼成蹊遍苑芳
紅英撲地滿筵香
莫將秋宴傳王母
來比春華壽聖皇

從宴桃花園詠桃花應制

唐趙彥伯

紅萼競然春苑曙
茸茸新色御筵開
長年願奉西王宴
近侍慚無東朔才

侍宴桃花園詠桃花應制

唐蘇頲

桃花灼灼有光輝
無數成蹊點更飛
為見芳林含笑待

遂同溫樹不言歸

桃花園馬上應制

唐張說

林間艷色驕天馬
苑裏穠華伴麗人
願逐南風飛帝席
年年含笑舞青春

蕭八明府寔處覓桃栽

唐杜甫

奉乞桃栽一百根
春前為送浣花邨
河陽縣裏雖無數
濯錦江邊未滿園

崦裏桃花

唐顧況

崦裏桃花逢女冠
林間杏葉落仙壇
老人方授上清籙
夜聽步虛山月寒

題百葉桃花

唐韓愈

百葉雙桃晚更紅
窺窗映竹見玲瓏
應知侍史歸天上
故伴仙郎宿禁中

大林寺桃花

唐白居易

人間四月芳菲盡
山寺桃花始盛開
長恨春歸無覓處
不知轉入此中來

下邳莊南桃花

白居易

邨南無限桃花發
唯我多情獨自來
日暮風吹紅滿地
無人解惜為誰開

寄題忠州小樓桃花

白居易

再遊巫峽知何日
總是秦人說向誰
長憶小樓風月夜
紅闌干外兩三枝

桃花

唐元稹

芙蓉脂肉綠雲鬟
畫樓臺青黛山
千樹桃花萬年藥

不知何事憶人間

亞枝紅

往歲與樂天曾於郭家亭子竹林中見亞枝紅桃花半在池水自後數年不復

記得忽於褒城驛池岸竹間見之宛如舊物深所愴然

元稹

平陽池上亞枝紅
悵望山郵是事同
還向萬竿深竹裏
一枝渾卧碧流中

玩新桃花

唐施肩吾

幾歎紅桃開未得
忽驚造化新粧飾
一種同霑榮盛時
偏荷清光借顏色

桃花

唐 白敏中

千朵穠芳倚樹斜一枝枝綴亂雲霞憑君莫厭臨風看
占斷春光 是此花

酬王秀才桃花園見寄

唐 杜牧

桃滿西園淑景催幾多紅艷淺深開此花不逐谿流出
晉客無因入洞來

千秋嶺下

唐 趙嘏

知有巖前萬樹桃未逢搖落思空勞年年盛發無人見

三十六谿春水高

小遊仙詩

唐曹唐

閒來洞口等劉君
緩步輕擡玉線裙
旋擘桃花擲流水
更無言語倚彤雲

桃花

唐周朴

桃花春色煖先開
明媚誰人不看來
可惜狂風吹落後
殷紅片片點莓苔

移桃栽

唐司空圖

獨臨官道易傷摧
從遣春風恣意開
禪客笑移山上看
流鶯直到檻前來

小桃

唐鄭谷

和煙和雨遞敷水
映竹映邨連灞橋
撩亂春風耐寒冷
到頭贏得杏花嬌

桃花

唐吳融

滿樹和嬌爛熳紅
萬枝丹彩灼春融
何當結作千年實
將示人間造化工

桃蹊

唐
陸希聲

芳草霏霏遍地齊
桃花脈脈自成蹊
也知百舌多言語
住向春風盡意啼

桃花谷

陸希聲

君陽山下足春風
滿谷仙桃照水紅
何必武陵源上去
澗邊好過落花中

桃花行

唐
闕名

源水叢花無數開
丹跗紅萼間青梅
從今結子三千歲

預喜仙遊復摘來

途次葉縣觀千葉桃花

宋
陶弼

三月官桃滿上林
一花千萼費春心
葉公城外襄河北
一樹無人色更深

嘗桃

宋
楊萬里

金桃兩釘照銀杯
一是栽花一買來
香味比嘗無兩樣
人情畢竟愛親栽

桃

宋
曾裘父

衣裁綳纈態纖穠猶在瑤池午醉中
嫌近清明時節冷
趁渠新火一番紅

桃

金段繼昌

一谿流水走青蛇春在江邊漁父家
竹外寒梅看欲盡
清香移入小桃花

舟行青谿道中入歙

元方回

蕨拳欲動茗抽芽節近清明路近家
五日緩行三百里
夾谿隨處有桃花

小桃

元王惲

梅粉飄零柳未煙一枝春色獨當軒今年盼得紅苞拆
風雪禁持第幾番

碧桃花

元張弘範

應是玄都觀裏仙為嫌白淡厭紅薦故栽一種新顏色
疑是飛仙墜翠鈿

題舜舉折枝桃

元趙孟頫

醉裏春歸尋不得眼明忽見折枝花向來飛蓋西園夜

萬燭高燒照爛霞

題宋徽宗獻壽桃圖

元柳貫

青鳥銜書昨夜來
蟠桃如斗核如杯
蓬萊殿上三千壽
不及春風夢已回

書扇寄玉岳在瑤芳所書是日食金桃

元楊維禎

昨日追隨阿母遊
錦袍人在紫雲樓
譜傳玉笛俄相許
果出金桃不外求

桃

明張新

綠淺紅深醉眼濃
殢人何處不迷蹤
飛時莫浪隨流水
自有春濤可化龍

桃花

明陳憲章

雲鎖千峰雨未開
桃花流水更天台
劉郎莫記歸時路
只許劉郎一度來

桃花圖

明岳岱

竹林深處有桃花
一半春風一半遮
尚憶春來三日醉

曉煙疎雨卧山家

婁塘里桃蹊即事

明
婁堅

雨洗臙脂風捲霞
醒來零落醉時花
殘尊好為輕陰盡
一片澄波隔絳紗

其二

無數亂紅看不足
碧潭還對一枝斜
春光欲去誰留得
水面浮來幾落花

詠上苑桃花

明
陶望齡

度索山頭駐彩霞
蓬萊宮闕即仙家
共傳西苑千秋實
已著東風一樹花

題劉松年桃花山水

明僧德祥

杳無雞犬有人家
夾水山高路不賒
劉阮別來頻甲子
年年春雨送桃花

遊西洞庭

僧德祥

玉柱金庭在洞中
當時誰道有毛公
人間白髮三千丈
只見桃花一片紅

御定佩文齋詠物詩選卷二百九十六